

আন্তর্জাতিক

মক্কা চুক্তিতে বাংলাদেশের আগ্রহ নিয়ে যা বলল ভারত

প্রতিবেদক: আন্তর্জাতিক ডেস্ক

প্রকাশের তারিখ: রোববার, ৩০ আগস্ট ২০২৬, ০৫:২৩ PM



পাকিস্তান, সৌদি আরব ও তুরস্কের স্বাক্ষরিত মক্কা প্রতিরক্ষা চুক্তিতে যোগ দেওয়ার বিষয়ে ইতিবাচক মনোভাব দেখিয়েছে বাংলাদেশ। বাংলাদেশ প্রস্তাব পেলে বিষয়টি ইতিবাচকভাবে বিবেচনা করবে বলে জানিয়েছেন পররাষ্ট্রমন্ত্রী খলিলুর রহমান।

গতকাল সংসদে এক বক্তব্যে পররাষ্ট্রমন্ত্রী বলেন, বাংলাদেশকে এই চুক্তিতে যোগ দেওয়ার প্রস্তাব দেওয়া হলে তা ইতিবাচক হিসেবে দেখা হবে।

এর আগে পররাষ্ট্র প্রতিমন্ত্রী হুমায়ুন কবিরও একই ধরনের মনোভাবের কথা জানিয়েছিলেন। তিনি বলেছিলেন, মধ্যপ্রাচ্যের কোনো নিরাপত্তা ব্যবস্থায় বাংলাদেশকে যুক্ত হওয়ার আমন্ত্রণ জানানো হলে সরকার তা ইতিবাচকভাবে নেবে।

বাংলাদেশের এমন অবস্থান নিয়ে শুক্রবার ভারতের পররাষ্ট্র মন্ত্রণালয়ের মুখপাত্র রণধীর জয়সওয়ালকে প্রশ্ন করেন সাংবাদিকেরা। এক সাংবাদিক পররাষ্ট্রমন্ত্রী খলিলুর রহমানের সংসদে দেওয়া বক্তব্যটি তার দৃষ্টিগোচর করেন।

জবাবে রণধীর জয়সওয়াল বলেন, □আমাদের জাতীয় নিরাপত্তার ওপর প্রভাব ফেলে এমন সব বিষয়ের ওপর সার্বক্ষণিক নজর রাখি □

এদিকে রংপুরে এক শিক্ষক ও তার স্ত্রী-সন্তানদের হত্যার ঘটনা নিয়েও রণধীর জয়সওয়ালকে প্রশ্ন করা হয়। জবাবে তিনি বাংলাদেশের হিন্দু সম্প্রদায়ের মানুষের নিরাপত্তা নিয়ে উদ্বেগ প্রকাশ করেন। তিনি বলেন, বাংলাদেশের হিন্দুদের নিরাপত্তার দায়িত্ব বাংলাদেশ সরকারের।

বাংলাদেশের পররাষ্ট্রমন্ত্রীর বক্তব্য নিয়ে পাকিস্তানের পররাষ্ট্র মন্ত্রণালয়ের মুখপাত্র তাহির আন্দ্রাবিও কথা বলেছেন। তিনি জানিয়েছেন, বাংলাদেশ চুক্তিতে যোগ দেওয়ার প্রস্তাব দিলে বা আগ্রহ প্রকাশ করলে সৌদি আরব ও তুরস্কের সঙ্গে বিষয়টি নিয়ে আলোচনা করবে পাকিস্তান।

বৃহস্পতিবার সাংবাদিকদের তাহির আন্দ্রাবি বলেন, এটি একটি প্রতিরক্ষামূলক কাঠামো। এর লক্ষ্য হলো এই অঞ্চলের শান্তি ও স্থিতিশীলতা রক্ষা করা।

তিনি আরও বলেন, একটি ক্রমবিকাশমান নিরাপত্তা কাঠামো হিসেবে চুক্তিটিতে সেই দেশগুলো যোগ দিতে পারবে, যারা যৌথ দায়িত্ব ও নিরাপত্তার স্বার্থে একই অঙ্গীকার ব্যক্ত করে।

বাংলাদেশকে ইঙ্গিত করে তাহির আন্দ্রাবি বলেন, কোনো দেশ এতে যুক্ত হওয়ার জন্য আনুষ্ঠানিক প্রস্তাব দিলে সৌদি আরব ও তুরস্কের সঙ্গে আলোচনা করে তা বিবেচনা করা হবে।

তবে পাকিস্তানের এই মুখপাত্র জানান, চুক্তিটি এখনো একেবারে প্রাথমিক পর্যায়ে রয়েছে।

এ বিভাগের আরও খবর



রাশিয়া-ইউক্রেন যুদ্ধে এ পর্যন্ত ৫ লাখ রাশিয়ার নাগরিক নিহত হয়েছে: যুক্তরাজ্যের সেনাপ্রধান
রাশিয়া-ইউক্রেন যুদ্ধের শুরু থেকে এ পর্যন্ত প্রায় সাড়ে চার বছরে রুশ শিবিরে নিহত হয়েছেন প্রায় ৫ লাখ মানুষ। এই নিহতদের মধ্যে সামরিক ও বেসামরিক...



২৪০ যাত্রী নিয়ে জাভা সাগরে নির্ধোঁজ জাহাজ
ইন্দোনেশিয়ার পূর্ব জাভা থেকে বোর্নিও দ্বীপের দক্ষিণ কালিমন্তানের পথে ২৪০ যাত্রী নিয়ে একটি যাত্রীবাহী জাহাজের যোগাযোগ বিচ্ছিন্ন হয়েছে। রবিবার...



সৌদি সামরিক ঘাঁটিতে হুথিদের মিসাইল-ড্রোন হামলা
সৌদি আরবের দক্ষিণাঞ্চলের একটি সামরিক ঘাঁটিতে মিসাইল ও ড্রোন হামলা চালিয়েছে ইয়েমেনের হুথি বিদ্রোহীরা। বাংলাদেশ সময় রোববার (১৩ সেপ্টেম্বর) মধ্য...



মধ্যপ্রাচ্যে আগ্রাসন ও একতরফা শৃঙ্খল আরোপে নিন্দা ব্রিকসের নেতাদের
জাতিসংঘ নিরাপত্তা পরিষদের (ইউএনএসসি) ঐক্যমতের পরিবর্তন-সহ বহুপাক্ষীয় সংস্থাগুলোর সংস্কারের জোর দাবি জানিয়েছেন ব্রিকসের শীর্ষ নেতারা। পাশাপাশি...

Copyright Dhaka Probe

অনলাইন সংস্করণ পড়তে ভিজিট করুন: <https://www.dhakaprobe.com/international/mkka-chukhte-bangladesher-agrh-niye-ja-bll-bhart>